

Peduru papeu Sesus tuktsa nanabyitaba napykyryknaha sibo ziwatahakazo

Peduru Sesus humo sispirikpotsa bo ziwatahaka. Wastuhu zuba sihyrinymyrykytsa wasanibara ty nisihyrinymyryky ana humo hi niakmyikinaha. Iwatahi Peduru Sesus tuktsa pe niy: — Pykyhytutahaktsa siharere bo ka batu yhỹ tsimaha — ana hi ziwatahaka. Deus Peduru ziapewywyky iwatahi Deus harere ziwatahaka, iwatsahi katsa kino niwatihi tanymyryky.

¹ Uta Simaõ Peduru, Deus zikwatawy iakzohota. Sesus tsumuëhĩtsa my. Sesus tuktsa sizubarëtsa bo piwatahaka. Papeu humo sibo piwatahaka. Sesus Kiristu wasani nikara, Deus wata my. Atahi Deus bo mymyoktyhyrykta. Ikiyahatsa mytuk Sesus humo ahaspirikporëtsa ata humo hi tsikspirikpokonaha. Ihumo tsikspirikponahaze katsaktsa mynamyrëtsa watsa tsimoziknaha.

² Deus harere bo hỹ tsimykaranaha. Ahawahi iharere bo hỹ tsimykaranaha iwaze isoho tsinymyrytohinaha. Deus bo ahatsyhyryze my:

— O Deus, myzo atyryktsa tysiakuwyky! tysipokzit-sikikta! tsimy — my.

Deus zahawatawyky iwatsahi wasani tsimykaranaha.

³ Deus nimywatawy iwatsahi katsa Sesus watsa tsi-moziknaha. Atahi wasani mynakara. Imysapyrënikita katsa iwatsa tsimoziknaha. Iwatahi Kiristu tazikwy ty mybo nyny my iwaze iharere bo hỹ tsimykaranaha iwa tsimyzurukunaha. Katsa nimywatawy anahumo kino myhyrinymyrëtsa h̃y. ⁴ Deus harere tihi:

— Kawata ahamysapyrētsa ahaziurētsa tsimoziknaha — niy. Anaharere humo hi tsimyspirikponahaze ahapuni-hikrētsa hỹ. Ahanamyrētsa watsa tsimoziknaha. Iharere ty ahabo wasania ty tsipokzitsiarēna mozik. Nawa ha ty tisapyrēna ty zuba ahabo nyny my. Nawa ha ty tisapyrēna ahabo nyny myze wasani tsimykaranaha. Pykyhytu iharere bo hỹ taha. Asaktsa Sesus humo sispirikpobyitsa tu iharere bo batu hỹ zikaha. Iharere batu siakparawy. Ikiahatsa mekywa tu tsimaha. Niwaha hi Deus mozi-hikik naha zuba tsimyzihikiknaha. Ahahyrikporētsa tsimoziknaha.

⁵ Iwatsahi ihumo tsikspirikpokonahaze tsipisapykynaha! Wasani tsimykarannahaze Deus harere tsinymyryziukunaha. ⁶ Niwa hi Deus nizihikik tsinymyrykynahaze ahape tu ahasopyk ahamysapybyitsa tsikykaranaha tsi-moewynaha. Ahape tu ahasopyk zeka ahakubyrisorokuja. Ahakubyrisorokrētsa zeka Sesus humo ahamypokzitsirētsa iwaze tu kytsa Sesus humo pahamyijakanaha iki-ahatsa ihumo ahamypokzitsirētsa. ⁷ Deus humo ahampokzitsirētsa tu zeka ahatukytsa tysisapywynaha. Batu ahamyi. Ahamyibi zeka ustsya kytsa tsysipokzitsikinaha.

⁸ Iwa tahaktsa! Iwa tsimyzurukunaha zeka parakbaha pahasohoziunaha:

— Asaktsa wasani mykaranaha. Sesus humo sispirikporētsa iwatsahi mysisapywykynaha. Ustsya mysipokzitsikinaha. Sesus tazikwy ty sibo nyny my iwatsahi mysipokzitsikinaha — mykaranaha.

⁹ Asaktsa Deus harere bo yhỹ ahabyi zeka sihyzikubyyitsa watsa. Kytsa tsikaeni zuba iktsya mykaranaha. Simysapybyitsa nikaranaha, Deus botu nisiokzohik anahumo hi nispiriktsokdanaha.

¹⁰ O katukytsa hawa ha ty Deus mozi-hikik ana humo zuba tsinymyrytohinaha. Iharere bo zuba pykyhytu

hyĩ tsimaha! Iwa tsimyzurukunaha zeka ba zimyinaha. Deus zahawatawy iwatsahi ahamysapyrētsa tsimozikunaha. ¹¹ Iwa tsimyzurukunahaze Sesus mymyoktrykta mype my:

— Katuk ahawahi tsimyzurukunaha. Pany kabo tyzekebanahaktsa! Uta kytsa sizubarētsa mysipehaze kaokzeka wasani my ikiahatsa kino niwatihi katukytsa sizubarētsa tysipehanaha — mykara. Iwa mypehakatsa Sesus Kiristu motsaso. Atahi Deus bo mymyoktrykta.

¹² Tubabatu Deus harere bo hyĩ tsikykaranaha, iharere bo botu hyĩ tsimykaranaha ahaspiriktsokda byihuja! Ana humo hi mopamykysozo. ¹³ Utakta kaspituze Deus harere ahabo motsasozo ana hi wasani my. ¹⁴ Mohyrikosokda naha humo Sesus Kiristu botu kabo mypubara ty nitaso. ¹⁵ Iwatahi iharere motsasoko. Iharere pykyhytu piwatahaka iwaze mohyrikosokdaze iharere humo batu ahaspiriktsokdahu, iharere bo mytsatzyiutaha.

Kiristu tsipunihikrēta. Imysapyrēnikita ana soho hi tsimytsasokonaha.

¹⁶ Katsa tsimytsasokonaha batu amybara petu mysopyk mypehakatsa Sesus Kiristu mybarawy bo myziksizo ana tyhi tsimytsasokonaha. Myziksizoze aparakbaha izikwy bo mokozoneha. Anaharere ikiahatsa bo iktsasoko. Ana kino Deus harere my katsaktsa izikwy botu tsinynaha atahi tsipunihikrēta. ¹⁷ Deus imyharerewabynikita. Atahi myzo my. Imysapyrēnikita my. Sesus hara jobonikita bete Deus ipe niy:

— Kawata tsamysapyrēta hỹ — iwa ipe niy. Deus yksoho tsiwabynaha:

— Atakta katse babata. Ihumo kakurēta. Ihumo kamypokzitsiarēta — niy. ¹⁸ Katsa hi iharere tsiwabynaha. Katsa Sesus tuk hara jobonikita beteze Deus yksoho bi-joikpe ikny tsiwabynaha.

¹⁹ Tubabatu Deus sohokotsa harere humo myspirikporëtsa. Siharere humo myspirikporëtsa, Deus yksoho bjoikpe ikny tsiwabynahaze siharere humo tsikspirikpotohinaha.

Deus sohokotsa harere bo mytsaty tahaktsa! Siharere rika wata. Miwa eze tuze rika iwaze kytsa mypubyi haeze iktsa niaha iwa Deus sohokotsa harere nimyhyrinymyryky iwatsahi tsinymyrykynaha. Myzokorosohoze byrisoik jekyrikoso natakaha. Sesus Kiristu myziksizoze tawata byrisoik jekyrikoso wata. Iwatsahi taperykynahaze Deus sohokotsa harere bo mytsatyziu tahaktsa! ²⁰ Deus sohokotsa iharere ty zuba ziwatahakanaha. Hawa mykara ana kino ziwatahakanaha. Deus hyrikoso humo pykyhytutaha ziwatahakanaha. Katsa niwatihi tsimypamykysonaha, Deus hyrikoso humo zuba tsimypamykysoziukunaha.

²¹ Deus sohokotsa harere humo nitsasokonaha. Deus hyrikoso nisiapewywyky. Deus hyrikoso humo zuba nitsasoikiknaha.

2

Deus soho humo meky watu mykaranahatsa.

¹ Tapara Sudeutsa tuk Deus sohobyitsa natakaha. — Katsaktsa Deus sohokotsa — mybarapetu nikaranaha. Atsawatu mahazo sihyrinymyrytsa mozumuzonaha. Deus sohobyitsa imysapybara ty pahahyrinymyryryna. Sesus harere bo batu ma sisopyk anatyhi pahahyrinymyryryna. Ikiahatsa kino niwatihi iharere bo batu ma ahasopyk ana hi mozihikiknaha. Deus Sesus Kiristu humo simysapybyitsa tu nikaranaha botu nisiokzohik anahumo kino batu hỹ niaha. Iwaze Deus sohokobyitsa sinini ykarawy bo mysipehahik. Sisopyksapybyitsa atsoko nasipykwy.

² Sizubarētsa siwatsa imysapybara ty mykaranaha. Iwaze ustsā kytsa sibo iktsa mykaranahaze:

— Sesus tuktsa wasani ahabyitsa mykaranaha. Pimyikiknaha naka batu imysapy mykaranaha Sesus humo sispirikpobyitsa watsa maha — mybarapetu mykaranaha. ³ Sihyrinymyrynikitsa amybara botu motsasokonaha. Tahapehawy ty zuba pahahyrinymyryknaha. Ahaokyrysaro mozihikiknaha iwatsahi wasanihabara ty pahahyrinymyrynaha. Mysispihikbataikiknaha Deus sibo iktsa mykara. Tubabatu sisoho:

— Kaokzeka batu simysapy — niy. Deus ba zikuru iwatahi nasisuparaka. Bykyze sinini ykarawy bo mysipehahik.

⁴ Bijoikpe ezektsa simysapybyitsa nikaranahaze Deus nisisininiwy. Sinini ykarawy bo nisipehahik. Batu sihumo impokzitsi. Sisapy eze miwa zuba, anaeze karikutsit-siwyttsa ty nisitsipawarakanaha iwaze nisihurukunaha. Anaeze piperyknaha, iwa myze Deus mybarawy ezektsa sihuak ty nyny my. Hawa zikzurukunaha ana humo hi sihuak ty sibo nyny my. Asaktsa wasanitsa bo isapyrēnikia ty sibo nyny my. Saustsa simysapybyitsa tu nikaranaha sinini ykarawy bo tahawahi mynapykyryknaha.

⁵ Tubabatu taparaktsa simysapybyitsa nikaranahaze Deus nisisininiwy. Batu sihumo impokzitsi. Myto ty nasiharasuwy Noe taoke tahyrytsa tuk iwatsa Deus nisierewy iwatsahi batu isty harasu. Asa zuba Deus harere bo hyĭ ziknakaranaha. Tapara myto Noe tihi:

— O kytsa ahamysapybyi tsimoewykynahaktsa! Deus harere bo hyĭ tahaktsa! — niy. Atazuba — O myzubaha wasani tsimykarannahaktsa! — nitsasoko.

⁶ Tubabatu Sodoma ezektsa Komora ezektsa ahatsa iwa Deus tihi:

— Ikiahatsa kaokzeka ahamysapybyitsa tsimykaranaha — niy. Iwaze nisibabaik. Deus izo bijoikpe ikny zipedahik. Sizubarëtsa niharakorobaiknaha. Ana humo hi Deus ustsá nispírikpokoro. Ustsá simysapybyitsa siakparawytsa, iwaha bo iktsa niahaze simysapybyitsa tymoewy. ⁷ Ro zuba niwak. Deus zibetesa zitsumuëhĩ. Deus okzeka atakta wasani nikara. Zikzibytuhukutu tisikpybyrëta kytsa hudikhudikwy ezektsa simysapybyitsa ziknakaranaha iwatahi tisikpybyrëta. Sisopyk humo iakubyita ziknakara. ⁸ Ro tsimysapyrëta nimymyijaikiknahatsa hi batu iaku. Zikzibytuhukutu kytsa tsasohowy ziwabykyze tisikpybyrëta. Hawa simysapybyitsa humo iakubyita ziknakara.

⁹ Asaktsa Deus harere bo hyỹ mykaranaha. Asahi iharere siakparawytsa mysitsumuëhĩkĩ iwatsahi batu imysapy batu zikaha. Deus zuba ihyrizikporënikita. Asaktsa iharere bo yhyỹ ahabyitsa mysimyitsapyriwyky. Ba zikspiriktsokda. Iwa myze Deus motsaso sinini ykarawy bo mysipehahik.

¹⁰ Asaktsa simysapybyitsa mozihikiknaha asa bo hi mysisininiwyky. Asahi mymysapybyrikinahatsa Deus harere bo batu yhyỹ zikaha. Ata kino mysisininiwyky. Asaktsa ty imysapybara ty zuba mymyhyrinymyrykynaha batu sisikpyby. Simytsatyhybyitsa tu ziknakaranaha iwatsahi imysapybara ty zuba mykaranaha. Kytsa mysimiyikiknaha. Tahaokzeka:

— Katsa zuba wasani tsimaha — mybarapetu mykaranaha. Bijoikpe ezektsa Deus tsumuëhĩtsitsa soho siharerewabymybarëtsa. Sisoho zisapybyrikinaha. Siharerepykyhybyikitsa. ¹¹ Bijoikpe ezektsa Deus tsumuëhĩtsitsa siharerepykyhybyikitsa harere ty hi batu tyso. O ikiahatsa ahamyharerewabyrëtsa. Iwatsatu sipunihikrëtsa Deus bo batu tyso:

— O asaktsa batu simysapy siharere batu imysapy — maha. Iwa batu tyso Deus zuba ihyrizikporënikita babata mytsaty nikaranaha.

¹² Asaktsa imysapybara ty mohyrinymyrykynaha siraratsa watsa. Hawa ha ty mozhikiknaha ana ty zuba mykaranaha, siraratsa watsa maha. Mytsaty zikahabyitsa mymyjikanaha. Utsa mysimyjaikiknaha. Deus asahi nasipykwy. Katsaktsa siraratsa werekywy bo mysibanaha. Asa wahi Deus mysipykwy. ¹³ Asaktsa utsa mysininivykynaha. Deus mysimytsapyriwy. Kytsa okzeka wasanibara ty mykaranaha. Okoroze simysapybyitsa mykaranaha. Mymyspihikbatakanahaze sakurëtsa nikaranaha. Batu sisikpyby. Ahatuk zeka tshayktsiarëtsa watsa maha. Simysapybyitsa nikaranaha humo ahayziktsiarëtsa waha maha ahabo mybarapetu mykaranaha. Ahatuk tahadisahakanahaze mymyjaikiknaha. Mymyjaikiknahaze sakurëtsa.

¹⁴ Wytykyryk bo iaktsa mahaze mysiakza tsihikiknaha. Kytsa Sesus humo tsikaeni zuba sispirikporëtsa mysimiywykynaha. Mysispihikbatakanaha. Taha bo zuba mynakaranaha. Okyrysaro bo zuba mytsaty mynakaranaha. Deus tihi:

— Utakta pahamytsapyriwy — niy. Ana humo kino ba zikwaknaha. ¹⁵ Asaktsa wasani batu siakparawy iwaze Deus harere bo batu ma zikaha. Kytsa nizaranahatsa watsa niyziknaha. Ske babata humo batu sihyrinymyry. Mykurunaha Barão wata Barão Beore tse niy. Atakta wasanibara ty nikara. Okyrysaro nizihikik iwaze imysapybyita nikara. ¹⁶ Deus pikuza ziharerewyky iwaze Barão zibetsakak. Pikuza tihi:

— Ikia Deus harere bo zuba hyÿ tsimyкта! — niy. Iwatahi pikuza tatsihitsa zibetsakak. Pikuza nitsaso Deus zikwy humo niy.

¹⁷ Asaktsa wasanibyitsa nikaranaha kytsa mysimiy-wykynaha. Asaktsa juhoha eze ky mytsehebaik naha eze ky waha. Bijoikpe zatata watsa zopoktsa mynabybykyk zekywa. Hyritsik mynawō naha ziky waha bo mytsaty tsimaha. Atsawatu ja my. Tozeka ja wasani maha, amybara tu sa tsipiperykynaha. Deus sisapy miwaha bo mysipehahik. Sisapy titsikdepykrēna anaeze tahawahi mynapykyknaha. ¹⁸ Asaktsa pahamyi tsihikiknaha. Siharere batu sisopyksapy. Sityrykmyitsa. Asahi:

— Katsa zuba wasani tsimaha. Iwazehi ustsā kytsa okeza bo mysiakzanaha. Taha bo zuba tsimynakaranaha. Deus okzeka katsa zuba wasani tsimaha — mybarapetu mykaranaha. Abaka asaktsa Sesus humo mospirikpokonaha asahi mymyi tsihikiknaha. ¹⁹ Siharere humo mypehakatsa harere bo batu yhỹ tsimaha, ana soho motsasonaha mybarapetu mykaranaha. Asa hi:

— Hawa ha ty katsa tsimyzihikiknaha iwa tsimyzurukunaha. Katsa wasani tsimyzihikiknaha zeka iwa tsimykaranaha. Katsa wasani ahabyi zeka atsatu tsimozihikinahaze Deus mymyoktyhyryk — maha. Asaktsa batu zikaha. Imysapybara ty nizihikiknaha iwatsahi wasaniha ahabyitsa mynakaranaha.

²⁰ Wastuhu kytsa ziakbatakanahaze Deus harere humo mospirikpokonaha. Imysapybara ty mykaranaha pi-moewynaha. Sesus Kiristu harere bo hyỹ mykaranaha atahi mysioktyhyrykta. Kyze kytsa Sesus harere humo batu siakparawy siharere hi piwabyziukunaha. Iwaze Sesus harere humo tsikaeni zuba piwabynaha. Iwatsahi simysapybyitsa mynakarazonaha. Tapara Sesus humo sispirikporētsa iwatsahi sipunihikrētsa niyziknaha. Abaka simysapybyitsa mynakarazonaha. Sipunihikbyitsa mozikzonaha. ²¹ Kytsa Deus harere humo batu

sihyrinomyry meky wa tu asahi tsikaeni zuba mysimy-itsapyriwy. Sihyrinomyrybyitsa tu mohyrikosokdana-haze tsikaeni zuba mysimyitsapyriwy. Asaktsa Deus harere zinomyrykynaha iwaze iharere bo tisapyrēna yh̄y nikaranaha kyze Deus sohokobyitsa nisimiywynaha. Iwaze simysapybyitsa nikarazonaha. Deus harere batu siakparawy. Asahi mohyrikosokdanahaze Deus mysisininiwy baba. Taparaka sihyrinomyrētsa iwaze iharere bo batu yh̄y mynakaranaha, asaktsa Deus sinini ykarawy bo mysipehahik. ²² Iwa nitsasoko:

— Tsikuparini tapytsui bo ziksizo iwaze tadisahazo — tsimaha. Kytsa Deus harere siakparawy bykyze yh̄y ahabyitsa tu zimiywykynaha tsikuparini watsa. Katsa iwa tsaso:

— Pazahare pihik ikny inazoze iwaze taparawy bo ziksizo tsahōrō bo — tsimaha. Atsawatu kytsa Deus harere tsikaeni zuba siakparawy bykyze hȳy aha byitsa tu zimiywykynaha pazaharetsa watsa. Asaktsa imysapybara ty mykarazonaha.

3

Sesus myziksizo.

¹ O kaharereziuwytša papeu usa ahabo piwatahaka. Papeu ty ahabo piwatahazo iwatsahi wasaniha bo zuba mytsaty tsimykaranaha. Botu tsiwabynaha anabo mytsatyzo tsimaha.

² Tubabatu Deus sohokotsitsa wasaniha soho nitsasokonaha. Nawa ha ty Deus mykara anaty hi botu nitsasokonaha. Siharere bo mytsatziutahaktsa! Sesus Kiristu myoktykytsa inasik. Abaka iharere tsiwabyz-iunahaktsa! Anaharere sakzohotsa ahabo nitsasokonaha. ³ Mybarawy mynapyksohoze kytsa simysapybyitsa

mykaranaha ahabo mozumunaha. Siakmyitsa. Asahi batu sisopyksapy taha bo zuba mytsaty mykaranaha. Asaktsa:

— Sesus Kiristu myziksizo ja — mykaranaha.

⁴ — Hawaze sa myziksizo. Haziu mykaranaha. Tapara isuknihyize atsatu mykara. Taparaktsa botu ni-hyrikosokdabanaha mybarawy batu ipyk. Koikny baktatu mykara — iwa mybarapetu mykaranaha. ⁵ Deus wytyk bijoikpe iwaha nizukni. Deus harere humo mybarawy niyzik. Wytyk pihik ikny natakahaze. Pihik jobo zatata tuk, pupuputsa wytyk ikny tu niaha. Deus pihik metutu nizapy. ⁶ Pihik zuba eze taparaktsa niakbabaiknaha. Hyritsik natatebaik naha bara humo niharazuzukbaiknaha. Myto humo pupuputsa zitsawakaknahaze niakbabaiknaha.

⁷ Abaka bijoikpe mybarawy kino niwathi Deus tawahi piperyky. Hawa eze zuba Deus myzihikze izo ty mybarawy pikorobawy ana humo hi mymykbaba. Abaka myto bara Deus izo humo mymykbaba. Iwaze kytsa simysapybyitsa mykaranaha sinini ykarawy bo mysipehahik.

⁸ O kaharereziuwytza mypehakatsa okzeka estuba okoroze tawa miu anos mytyk tseheze ky wa. Mytyk tseheze ky wa okoroze tawa ihumo atsatu ana bo kino mytsaty tsimahaktsa! ⁹ Sesus botu niy:

— Uta myziksizo hỹ — niy. Asaktsa simysapybyitsa hi:

— Atakta myziksizo ja — mykaranaha. Kytsa simysapybyitsaktsa Deus sinini ykarawy bo mytsaty zuba mykara iwatahu tsiakubyrisorokrēta. Ihumo sispirikpobyitsa batu sakbazyky iwatahi tsiakubyrisorokrēta. Asahi simysapybyitsa tu nikaranaha pimoewynaha iwatahi tsiakubyrisorokrēta.

¹⁰ Sesus atsoko myziksizo. Myzuba typerybyitsatu atsoko myziksizo. Itsyhyryboa tawata unata eze kytsa

namy pebykyryk. Iwapuruze Sesus myziksizoze itsyhyryboata mozumuze tawata ity peryhy byitatu mozumu. Iwaze bijoikpe nepyk. Tapara nitotokoknaha ykpyri humo nepyk. Niwa ha ty bijoikpe eze tsizubarēna mohokdaba iwa mopyk. Mybarawy kino niwatihi mokoroba. Deus tsizubarēna pepykba, tsizubarēna mohokdababa ana humo hi ja tsahahyrinymyrētsa.

Deus Sesus myzipehazoze ana humo hi tapery!

¹¹ Iwaze ahamysapybara ty tsimykaranaha zeka ahasopyk tsimoewykynahaktsa! Tsipisapywykynahaktsa! Deus harere bo zuba hyỹ tahaktsa! ¹² Iwaze Deus Sesus myzipehazoze ana humo hi tapery! Iwazehi bijoikpe mokoroba. Mopyk. Mybarawy eze ky kino niwatihi izo humo mynatsotsokbaik. ¹³ Deus mybaratsa pe niy:

— Usa mybarawy mozokni. Usa bijoikpe mozokni usa wytyk mozokni. Anaeze wasanitsa zuba mynapykyryknaha. Simysapyrētsa zuba anaeze mynapykyryknaha — niy. Ana hi taperyky.

¹⁴ Kaharereziuwytza ahahumo kamypokzitsiarēta. Hawa eze Sesus myziksizo ana humo hi taperyky. Iwatsahi ahamysapybara tsimoewynaha. Tyzibytuhukutu Deus harere bo ma tsimykaranaha. Wasani iharere bo hyỹ tsimaha zeka ahakurētsa tsimoziknaha. Mekywa tu tsimoziknaha. ¹⁵ Mypehakatsa aibani zuba myziksizo iwa zeka ustsya kytsa Deus bo mysiokty tsihikik. Iwatahi mytuk tsiakubyrisorokrēta mykara, ana humo kino mytsatzyiutaha.

Pauro mytsy ihumo mypokzitsirētsa botu ahabo ziwatahaka. Iwapuruze Sesus myziksizoze botu isoho ziwatahaka. Atakta tsihyrinymyrēta babata. Deus zihyrinymyryky iwatahi ahabo ziwatahaka Deus tahyrinymyrywy ibo ziwatawyky atsatu ahabo

ziwatahaka. ¹⁶ Tsiharerehokdarêta. Imyspirikpowy kino niwatihi tsihokdaharêna. Iwatsahi kytsa sizubarêtsa iharere myzimyikiknaha. Kytsa asahi Sesus humo sispirikporêtsa tsikaeni zuba iharere myzimyikiknaha. Iwatsahi mohyrikosokdanahaze Deus sinini ykarawy bo mysipehahik.

¹⁷ Kaharereziuwytša. Kamyspirikpowy bo wabyziutaha! Ikiahatsa Sesus humo ahaspirikporêtsa. Kytsa mozumunahaze pahamyi tsihikiknaha ana humo hi ahahyrinymyrêtsa. Pykyhytutaha! Asaktsa Deus harere batu siakparawy sihumo pykyhytutaha iwatsahi batu ahamyi.

¹⁸ Ikiahatsa hi Deus harere bo zuba hyÿ tsimykaranaha. Mymyoktyhyrykta harere humo zuba hyÿ tsimykaranaha. Atahi ahahumo tsimypokzitsiukrêta. Isoho tsinymyrytohinaha. Ihumo tyspirikpotohinaha. Ipe tsimaha:

— Ikia zuba tsamysapyrêta. Ikia tsapunihikrêta — tsimaha. Abaka ana ty hi tynatsasokonaha. Katsaktsa ituk mywahi tsimynapykyknahaze iwa tsimynatsasokonaha. De. Niwazuba.

Peduru

Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 19 Oct 2021 from source files dated 17 Oct 2021

2f0260ea-5969-5180-9ac5-183d63a989f1